

Kempen perlu berpada-pada

Jangan sampai hubungan kekeluargaan, persahabatan terputus

NORHASPIDA YATIM

KUALA TERENGGANU

Walaupun tarikh penamaan calon belum tiba, kempen-kempen politik telah bertiep kencang terutama di media sosial popular seperti Facebook dan aplikasi mudah alih, WhatsApp.

Justeru tidak hairan jika hampir semua peringkat usia bercakap soal politik, tidak mustahil juga ada dalam kalangan murid di bangku sekolah pun sibuk mempertahankan ayah aku menyokong parti A dan sekumpulan lagi menyatakan ayah aku menyokong parti B.

Timbalan Dekan Akademik

dan Siswazah Fakulti Perubatan UniSA, ProfDr Harmy Mohamed Yusoff berkata, walau apa pun kecenderungan politik, ia perlu disandarkan batas tertentu agar tidak merosakkan hubungan kekeluargaan dan persahabatan.

"Media sosial adalah platform baharu dan popular untuk berinteraksi dan menyampaikan pandangan dan rasa hati.

"Namun, teknologi ini mewujudkan pengantara baharu yang berupaya menghilangkan hubungan manusiawi di antara kita," katanya.

Harmy yang juga Timbalan Presiden Pertubuhan Amal Perubatan Ibnu Sina Malaysia (Papisma0) berkata, kajian menunjukkan komunikasi yang tidak secara terus atau menggunakan media sosial cenderung menyebabkan rasa kurang empati, hilang rasa keakraban, menurun rasa hormat dan kurang rasa keartikaitan antara satu sama lain.

"Situasi itu berlaku disebabkan kita tidak dapat melihat dan menerima reaksi secara terus daripada individu yang kita berhubung,



Setiap orang mempunyai kecenderungan politik masing-masing."

- Harmy

"Jadi, terdapat kemungkinan dan kecenderungan kita untuk berkomunikasi secara kasar, biadab dan kurang berhati-hati," katanya.

Menurut Harmy, ada setengah beranggapan kesan me-

sej itu tidak begitu ketara walaupun ia sebenarnya boleh meninggalkan kesan emosi dan psikologi yang mendalam kepada penerimanya.

"Setiap orang mempunyai kecenderungan politik masing-masing berdasarkan ilmu, maklumat dan latar belakang kehidupan masing-masing.

"Dalam keadaan demam pilihan raya ini, kecenderungan setiap individu untuk berkempen bagi memenangkan ideologi politik masing-masing sukar dielakkan," katanya.

Mengulas lanjut, pilihan raya mungkin lima tahun sekali, namun hubungan persahabatan dan kekeluargaan adalah berpanjangan dan berkekalan.

"Apa pun ideologi kita, ia perlu menghormati pendirian rakan atau ahli keluarga masing-masing dan jangan sesekali merosakkan hubungan silaturahim yang telah terjalin sejak sekian lama.

"Media sosial masih merupakan sebahagian daripada zon peribadi yang perlu kita hormati," katanya kepada Sinar Harian.



KAEDAH WUJUDKAN BUDAYA KOMUNIKASI MEDIA SOSIAL MATANG

- Jangan sebar bahan kempen berunsur fitnah dan burukkan parti lawan.
- Jangan kirim mesej menyakitkan hati dan mengundang kemarahan.
- Jangan guna jawatan, kedudukan, pengaruh untuk memaksa ahli kumpulan media sosial terima pandangan kita.
- Elakkan berbalas mesej beremosi dalam perkara yang kontroversi.
- Fikir dan lihat mesej tersebut berulang kali sebelum mengirimmkannya ke media sosial agar tidak menimbulkan kontroversi

- Hormati tujuan kumpulan seperti WhatsApp diwujudkan. Jika ia ada tujuan spesifik seperti membincangkan sesuatu perkara dan bukannya urusan sosial, tidak perlu masukkan urusan politik di situ.
- Hantar maklumat yang membantu setiap warganegara/rakan/ahli keluarga untuk membuat pilihan yang betul
- Mohon maaf jika ada maklumat atau kempen yang menyebabkan ahli-ahli lain tidak senang hati.